

全五代詩

金瓶梅

全五代詩卷十三

羅江李調元雨村 編

漢

張 昭

昭本名昭遠避漢祖諱止稱昭字潛夫濮州

范縣人歷仕唐晉至漢爲兵部尙書封舒國

公入宋卒有嘉善集

宋史昭旣冠以父失所在時盜賊讎起道路榛

梗乃自秦抵蜀徒行丐食求父所在積十年

不能得乃發哀行服躬耕海濱青州王師範

開學館延至儒士再以書幣招置署賓職師

範降梁直脫難北歸以周易春秋教授學者

自遠而至時號逍遙先生昭始十歲能誦古

樂府詠史詩百餘篇未冠編讀九經盡通其

義處饒類中緩步闊視以爲馬鄭不以若也
後至贊皇遇程生者專史學以爲專究經旨
不通今古率多拘滯繁而寡要若極談王霸
經緯治亂非史不可因出班范漢書十餘義
商榷乃授昭荀紀國志等後又盡得十三史
五七年閒能馳騁上下數千百年事又注十
代興亡論處亂世躬耕負米以養親後父卒
服闋召爲戶部侍郎以唐史未成詔與呂琦
崔悅等續成之別置史館命昭兼判院事昭
又撰唐朝君臣正論二十五卷上之改兵部
侍郎八年遷吏部判東銓兼史館修撰判館
事開運二年秋唐書成二百卷加金紫堦進
爵邑三年拜尙書右丞判流內銓權知貢舉
漢初復爲吏部侍郎時追尊六廟定謚號樂
章武曲命昭權判太常卿事月餘卽眞乾祐
二年加檢校禮部尙書少帝年十九猶有童
心昵比羣小昭上言請聽政
之暇數召儒臣講論經義云

漢宗廟樂舞辭

高廟明靈再啟圖金根玉輅幸神都巢阿丹鳳銜書
命入昴飛星獻寶符正撫薰弦娛赤子忽登仙駕泣
蒼梧薦櫻鶴館筵簫咽酌鬯金楹劍珮趨星俎雲軿
兼魯禮朱干象箭雜巴渝氤氲龍麝交情瑣髣髴錫
鑾下藻珠薦豆奉觴親玉几配天合祖耀璿樞受釐
飲酒皇歡洽仰俟餘靈泰九區

夜吟寶輦集追思夷門題處已三稔矣悽然感
興書之

往歲記時梁苑夜今宵題處洛城秋浮生瞥電人何
在懷舊傷心淚迸流三徑竹風鄰笛怨一庭霜月并

梧愁妻兒未會予惆悵只怪燈前不舉頭

王仁裕

仁裕字德輦天水人初爲秦州判官入蜀爲

中書舍人翰林學士歷唐晉至漢爲戶部尙

書太子少保致仕卒所作有西江集

十國春秋仁裕

少時嘗夢剖其腸胃以西江水滌之顧見江中沙石皆成篆籀之文由是文思日進生平作詩逾萬首蜀人呼曰詩窖子宋事寔類苑王公終於大子太保七十後精力不衰每天氣和暖必乘小駟從二四老蒼頭攜照袋以皮爲之四方有蓋其中可容一斗以來中貯筆硯韻略刀子礪石箋紙數十幅并小樂器之屬備酒炙三五人之具門生侍行出郊野遇園亭有竹樹之處燕賞終日賦詩品小管盡醉而歸胡孝轅癸籤公宴合樂每酒

行一終伶人必唱囉酒然後樂作此唐人送
酒之詞本作碎言今多作平聲文士亦感之
葉石林引王仁裕詩淑景易從風雨去芳尊
須用管弦囉爲證然仁裕本集自作開字下
聯仍有催韻石林不知據何本也全唐詩
話仁裕大散關句云鐵鎖寨門扃白日大張
旗幟插青天

上梓潼山

從蜀後主幸秦川作

綵杖拂寒煙鳴騶在半天黃雲生馬足白日下松巔
盛德安疲俗仁風扇極邊前程問成紀此去上三千

題劍門

和蜀後主作

孟陽曾有語刊在白雲稜李杜常挨托孫劉亦恃憑
庸才安可守上德始堪矜暗指長天路濃巒蔽幾層

荆南席上詠胡琴妓二首

天下大定錄云荆南高氏先建渚宮于府

西北隅延袤十餘里亭榭花木甚盛從誨紹立尤加完葺廣招伶倫樂籍間多有梁園舊物從誨明音律僻好胡琴有女妓數十皆善其事仁裕使荆渚從誨閑宴出十妓彈胡琴爲詩美之

紅妝齊抱紫檀槽
一抹朱絃四十條
湘水淩波慚鼓瑟
秦樓明月罷吹簫
寒敲白玉聲偏婉
暝逼黃鶯語自嬌
丹禁舊臣來側耳
骨清神爽似聞韶

玉纖挑落折冰聲
散入秋空韻轉清
二五指中勾塞鴈
十三絃上囀春鶯
譜從陶室偷將妙
曲向秦樓寫得成
無限細腰宮裏女
就中偏愜楚王情

題麥積山天堂

玉堂閒話云麥積山者北跨清渭南漸雨當岡巒巖起一石高

萬尋其青雲之半梯空架險有散花樓由西閣
懸梯而上有萬菩薩堂並就石鑿成自此室之
上有一龕謂之天堂空中倚一獨梯至此萬中
無一人敢登者仁裕獨登之仍題詩于天堂西
壁前唐末
辛未年也

躡盡懸空萬仞梯等閒身共白雲齊簷前下視羣山
小堂上平分落日低絕頂路危人少到古巖松健鶴
頻棲天邊爲要畱名姓拂石殷勤手白題

題斗山觀

玉堂閒話云興元斗山觀自平川聳起一山四面懸絕其上方於斗底故

號之有唐公助飲李八百仙酒全家拔宅之迹
仁裕辛巳歲爲節度判官嘗以片板題詩于觀
癸未年入蜀因謁嚴真觀見斗山詩牌在焉不
知所來舊說雲斗山一洞與嚴真觀井相通也

霞衣欲舉醉陶陶

公昉家飲入百洗瘡酒醉而上昇

不覺全家住絳

霄拔宅只知雞犬上天誰信路岐遙三清遼廓拋
塵夢八景雲煙事早朝爲有故林蒼柏健露華涼葉
鎖金甌

題孤雲絕頂淮陰祠

玉堂閒話云興元之南有大竹路通巴川深谿峭巖

捫蘿

一上三日達山頂復登嶺其絕頂謂之孤

雲兩角彼中諺云孤雲兩角去天一握淮陰侯

祠在焉昔漢祖不用韓信遜歸西楚蕭相國追
之及于茲山故立廟貌仁裕嘗佐襄梁帥王思
同南伐巴人往返
登陟畱題于祠

一握寒天古木深路人猶說漢淮陰孤雲不掩興亡
策兩角曾懸去住心不是冕旒輕布素豈勞丞相遠
追尋當時若放還西楚尺寸中華未可侵

和韓昭從駕過白衛嶺

龍旆飄飄指極邊到時猶更二三千登高曉蹋巉巖
石冒冷朝衝斷續煙自學漢皇開土宇不同周穆好
神仙秦民莫遣無恩及大散關東別有天

賀王溥入相

石林詩話云仁裕知貢舉取王溥
爲狀元時年二十六後六年溥拜

相時仁裕猶致仕
無恙賀以詩曰

一戰文場拔趙旗便調金鼎佐無爲白麻驟降恩何
極黃髮初聞喜可知跋勅案前人到少築沙堤上馬
歸遲立班始得遙相見親洽爭如未貴時

與諸門生春日會飲繁臺賦

柳陰如霧絮成堆又引門生飲古臺淑景卽隨風雨
去芳樽宜命管絃開謾誇列鼎鳴鐘貴甯免朝烏夜
免催爛醉也須詩一首不能空放馬頭回

示諸門生

談錄云仁裕知貢舉時已年高有數子皆早亡諸孫並幼一日生徒畢集

出詩
賤曰

二百一十四門生春風初長羽毛成擲金換得天邊
柱鑿壁偷將榜上名何幸不才逢聖世偶將疏網罩
羣英衰翁漸老兒孫小異日知誰略有情

五代史補
陶穀讀二

四聯曰大奇大奇不意
王仁裕今日板賊頭也

過平戎谷弔胡嗣

嗣有文學佐荆湖藩幕善草軍書蔑視副軍構之主帥盡

室坑平戎谷仁
裕過而弔之

立馬荒郊滿目愁伊人何罪死林邱風號古木悲長
在雨溼寒莎淚暗流莫道文章爲眾嫉只應輕薄是
身讐不緣魂寄孤山下此地堪名鸚鵡洲

奉詔賦劍州途中鷲獸

蜀後主幸秦川至劍州西鷲獸于路左叢林間

躍出搏一人去至行宮顧問臣僚皆陳恐懼命仁裕及李浩弼等賦之後主覽之大咲曰二臣之詩各有旨

劍牙釘舌血毛腥窺算勞心豈暫停不與大朝除患
難惟於當路食生靈從將戶口資嚙口未委三丁稅
幾丁今日帝王親出狩白雲巖下好藏形

放猿

仁裕從事漢中有獻猿兒者憐其黠慧育之名曰野賓經年壯大跳擲頗爲患繫紅

綃于頸題

詩送之

放爾丁甯復故林舊來行處好追尋月明巫峽堪憐
靜路隔巴山莫厭深棲宿免勞青嶂夢躋攀應慙白
雲心三秋果熟松稍健任抱高枝徹曉吟

遇所放猿再作

仁裕罷職入蜀行次漢江壩嶠

道畔古木間垂身下顧紅綃宛在以野賓呼之
聲聲應立馬移時不覺惻然遂繼之一篇云

嶠冢祠前漢水濱飲猿連臂下嶙峋漸來子細窺行
客認得依稀是野賓月宿縱勞羈縻夢松餐非復稻
梁身數聲腸斷和雲叫識是前時舊主人

符彥卿

彥卿字冠侯陳州宛邱人後唐中書令存審
之子漢乾祐中加中書令封魏國公歸宋卒
劉斧清瑣高議大夫丞相李公昉嘗言當日
目外鎮爲麤官符彥卿知汴州有詩云云公
之詩意益有
慨之詞爾

知汴州作

全軍十萬擁雄師正是酬恩報國時
汴水波濤喧鼓角隋堤楊柳拂旌旗
前驅紅旆關西將環坐青蛾趙國姬
爲報長安冠蓋道麤官到底是男兒

趙逢

逢字常夫，馮州懷戎人。漢乾祐中擢甲科，授

祕書郎直史館，入宋官諫議大夫卒。

宋史逢
敏歷清

近所至有聲然傷慘酷又言
多詆訐故縉紳目之爲鐵檟

懷夢英大師

林巒影裏有清賢，與我相知二十年。書札愛工精玉篆，利名拋捨住金田。吟容賈島稱詩匠，醉許劉伶作酒仙。別後近聞棲華嶽，亂雲應得恣情眠。

王 著

著字成象，單州單父人。漢乾祐中進士官至

翰林學士，入宋卒。

贈夢英大師

到處聞人乞篆蹤學來年久有深功墨池闊類湘江
水筆冢高齊太華峯金錫罷飛新解虎鐵盂收掌舊
降龍知師吟戀煙村景不肯回頭望九重

許仲宣

仲宣字希粲青州人漢乾祐中進士官至太

子中允入宋卒

宋史仲宣爲濟陰主簿時令與簿分掌縣印令畜嬖妾與

其室爭寵令弗能禁嬖欲陷其主竊取其印藏之封識如故以授仲宣翼日署事發匣則無其印因逮捕縣吏數輩及令簿家人下獄鞫問果得之於令舍竈突中令聞之倉皇失措仲宣處之晏然人服其量